



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 8

**PM Pham-i New Delhi semdangba mapang
"India, Vietnam na tesendaktep atsulangshitsü"**

**England white-ball coach Matthew
Mott-i mapa toktsüogo**



VOL. XXI ISSUE NO. 288 (ADOK 288) DIMAPUR RASEMNÜ (WEBBESDAY) CHITENI (JULY) 31, 2024 ₹ 5.00

Dikhu Hydro Electric Project ajanga district 3 dang masü Nagaland ajunga ajangzüksü

Dimapur, July 30, 2024 (TYO): Nagaland nung Dikhu Hydro Electric Project atema ali kibur kari haihaura makaba ajanga mapa metenzükter aser iba mapatong ya sangküm March ita tashi nung metenzükra Centre sorkari agientsü akok.

Iba khuret atema Department of Power, Nagaland (DoPN)-i Hombarnü 186 MW Dikhu Hydro Electric Project (HEP) den sendaktepa alirtem den senden ka menogo.

Iba senden nung kaketshir telok asem- Ao Kaketshir Mungdang (AKM), Konyak Students Union (KSU) aser Phom Students Union (PSU) nungi ketdangpurtem aden.

Senden nungsa Business Association of Nagaland (BAN), Mokochung Chamber of Commerce and Industry (MCCI), Longleng Chamber of Commerce and Industry (LCCI) aser Mon Chamber of Commerce and Industry (MCCI) nungi teshimtet nübotem aden.

Iba mapatong ajanga Mon, Longleng aser Mokochung district tem kongshir aser yimtsüng kari memulungba ajanga mapa metenzükteri arur.

1990s nung Dikhu Hydro Electric Project ya 120 MW capacity project ka asütsü lemtet aser iba sülen anaben melenshir tang 186 MW capacity project kümogo.

2000s tetenzüklen NEEPCO-i Department of Power Nagaland (DoPN) dang 140 MW project akümtsü shidanga liasü. Iba sülen 2009 nung DoPN-i 186 MW capacity unit yanglutsü atema Manu Energy Systems (MES) Pvt Ltd den nangzüktepa liasü. Iba mapatong ya Rs 1900 shi endoka yanglutsü aser iba nung department-i 24% aser MES-i 76% lemdangtsü nangzüktep.

Ajisüaka, küm 15 süia aruaka ali atema tangatettep kati marutetba ajanga iba mapatong meinyakteter aser Central Electricity Authority ajanga Techno-Economic Clearance (TEC) agütsüba March 2025 nung mapang tembangtsü.

Iba jagi Department of Power, Nagaland (DoPN)-i kaketshirtem aser shishilembartem den osang lemsateptsü aser mapatong tejakleni bener aotsü atema July 29, 2024 nü "Stakeholders Meet" ayongzükta agi.

"Iba mapatong ya kanga

tongtipang lir kechiyong Nagaland-i peak power 180 MW nüngdaker aser Dikhu HEP ajanga mei mapang 180-185 MW tashi power agütsütsü aser asükwa 40-50 MW tashi agütsütsü" ta Hydro Strategist Er. Moa Aier-i senden temer osangbener den jembidang ashi.

"Iba mapatong ajanga ali 2000 hectares shi kongshitsü saka iba nung yimtsüngtembo maden. Yimtsüng ana nung tsüklu kar kongshitsü saka osang tejangjaba metettsü atema comprehensive survey ka agidar" ta Er. Moa-isa ashi.

"DoPN-i Environmental Impact Assessment (EIA) ka renemtsü sentong lir. Department-i public den ajurutepa sensaksemtsü aser clearance memeshidang lipoküm dak sendakba khurettem repringshimtsü" ta paisa ashi.

"Coal-based thermal power dang nungibo hydroelectric power ya kanga agi tajungba lir. Department-i district asem nung village council, district administration aser kin hohotem den jembia arudar. Ajisüaka sendaktepa alir aikati iba mapatong indang osang

tejangjaba metettsü atema maneni olemtep alitsü ashir" ta Er. Moa-isa ashi.

Dikhu Hydro Electric Project nung ali nüngdakba yimtsüngtemji Mon nung 5, Longleng nung 7 aser Mokochung nung 3 lir.

"Kaketshirtem aser shishilembartem iba mapatong meteta alitsü atema tanü senden ayonga amener. Yaküm iba mapatong nung densema aliba yimtsüng 15 nungi züngsemtem den consultative committee senden ka menogo aser onoki kin asem hohotem dena jembia arudar" ta Er. Moa-isa ashi.

Yimtsüng kari mapatong magizükba ya ali melen temenok atema masü saka alemli nungi ali bentshia aruba inyakyim atema lir ta Chief Engineer (DnR and HoD) Wangmeren Jamir-ia ashi.

AKM President Lanutoshi Aier-ia osangbener den jembidang iba mapatong ajanga yimtsüngtem aser district atema tajangzük bentsür arutsü ta ashi.

Doyang hydro project ajanga entrepreneurship aser tourism jenjang kanga junga kümdaktsüogo aser iba mesükji Mokochung, Longleng aser

Mon nunga tajangzük alitsü ta Lanutoshi-ia ashi.

"Paisa yimtsüngtem dang Nagaland aser district tem ajangzüksü asoshi iba mapatong nung yariteptsü mepishia metetdaksü. Yimtsüng kar ajanga iba mapatong meinyaktettsüsa kümra tarutsü putui mepelatsü. Maneni iba mapatong ajanga yimtsüng kar asoshi takoksa bentsür arutsüsa süra onoki yariteptsü" ta Lanutoshi-isa metetdaksü.

KSU President Temwang Konyak-ia iba mapatong ya maongka tulu ka lir aser ali kiburtem dang masü saka district asem aser Nagaland nung nübotem kanga ajangzüksü ta ashi.

"Iba mapatong ya yimtsüng anati magizüker saka onoki tribal council lemtet sülen noktaksü. Mapatong magizükaka iba mapatong ajanga tajangzük aika bentsür arutsü" ta PSU President Dape Phom-ia ashi.

Yashi amenba senden nung Department of Power-i Phom Students' Conference, Konyak Students' Union aser Ao Kaketshir Mungdang den külem sangdong ka nung sign sütepogo.

Süingratsü nunger councilors nem tenüngsang agütsü

Mokokchung, July 30, 2024 (Agencies): Süingratsü Senso Senden Mokochung (SSM)-i July 30, 2024 nü taküm ULBs election nung takok angur senso pezü nem tenüngsang agütsüba sentong ka ayonga agiogo.

Mokokchung Municipal Council (MMC) kübok ward balala nungi Süingratsü nunger senso pezüü takok ngua liasü aser tanü Majakong Ward Community Hall nung parnok nem tenüngsang agütsüba sentong ka agiogo.

ULBs election nung Süingratsü nunger candidate 6 toktepa liasü aser parnok rongnung tetsür asem aser tebur kati pei pei ward nung takok angu. Takok angurtem ya Bendangkumba Aier NDPP (Majakong Ward), Maongtula Longchar NDPP (Alempang), Yongkongsang R Congress (Artang) aser N Imtinenla Ao Independent (Sungkomen) nunger lir.

"Süingratsü nungeri 1970s nung ken shikari aodang keyi 12 tashi tepset aser iba mapang ibaji konang aser tetushi ama züngshi. Ajisüaka tanü putu nungbo election nung toktepa takok anguba ajanga konang aser tetushi angur" ta Süingratsü Village Council Chairman M Taka Longchar-ia ashi.

Asenoki takok anguba atema benjungteptsüla saka nenok jakdang teinyaktsü mapa aser tebilemstü khuret tulu lir ta metettsüla. Taruba küm pungu

tsüngda nenok ward aser jila asoshi teinyaktsü aika lir. Anungji nübottemi aginüba ama mapa inyakang kechiyong parnoki nenok nem takok ngudaktsü" ta Taka Longchar-ia MMC councillor tem ayongzük.

"Nenok takok ngudaktsüba nübottem dang kanga pelatsüla. Nübottemi nenok takok ngudaktsüba akhümtsübuang aser councillor ama inyakang nür kiyongertem atema teti bilema inyakang" ta All Ward Union Mokochung President Lemasashi Ozukum-ia ayongzük.

"Nagaland Municipal Act 2023 nung Arrla kar ajanga ali kiburtem den obang meputep adoktsüsa lir anungji item mapa inyakang taintem aser mongintem den asüngdangtepa inyaksüla" ta paisa ashi.

Councillor tem tenüng nung Bendangkumba Aier-ia o jembidang Süingratsü nunger ajak dang pelaba metetdaksü.

"Election mapang nenoki onok

yariba atema tenüngsang agütsür aser maneni onok wadang inyaka aodang pusema nungittsü mepishir" ta Bendangkumba-isa ashi.

Assam aser Meghalaya Governor temi tezüngzüktep agiogo

Guwahati/Shilong, July 30, 2024 (Agencies): July 30, 2024 nü Assam aser Meghalaya nung Governor tasentemi tezüngzüktep agiogo.

Tanü Guwahati nung Lakshman Prasad Acharya-ia Assam Governor inyaksü tezüngzüktep agiogo.

Srimanta Sankardeva Kalakshetra nung Gauhati High Court Chief Justice Vijay Bishnoi-ia Governor Acharya nem tezüngzüktep agidaktsü aser iba sentong nung Chief Minister Himanta Biswa Sarma, cabinet minister tem aser ketdangsurtem aden.

Governor Acharya-ia Gulab Chand Kataria melenzüker. Kataria ya Punjab governor aser

Union Territory of Chandigarh administrator inyaksü atema mapa belenogo.

Arishi küm 59 tain Acharya-isa Manipur Governor ama repsema inyaksü. Pa ya Sikkim nung Governor inyaka liasü.

Acharya ya taoba RSS aser BJP züngsem liasü aser Uttar Pradesh Legislative Council nung shilem agiogo.

Acharya-isa asüng Manipur Governor inyaksü atema tezüngzüktep agitsü. Manipur nung pai Anusuiya Uikye melenzüksü aser asüngnep 9:30 ako nung Raj Bhavan, Imphal nung tezüngzüktep agitsü.

Maneni, tanü taoba Karnataka minister Chandrashekhara H

Vijayashankar-ia Meghalaya Governor inyaksü tezüngzüktep agiogo.

Raj Bhawan, Shillong nung Meghalaya high court chief justice S Vaidyanathan-ia Governor Chandrashekhara-ia tezüngzüktep agidaktsü aser iba sentong nung chief minister Conrad Sangma, cabinet minister tem aser ketdangsurtem aden.

Vijayashankar-ia 1994 küm takok ngua Karnataka legislative assembly nung züngsem aküm. Iba sülen 1998 nung pai Mysore constituency nungi Lok Sabha MP aküm aser 2004 nunga maneni takok angu. Pai Karnataka sorkar nunga cabinet minister inyakogo.

Opposition-i aijaka Nirmala Sitharaman-i Union Budget pusemer

New Delhi, July 30, 2024 (Agencies): Parliament nung Opposition-i sorkar yimsü state temi Union budget kanga aija arur aser tanü Union Finance Minister Nirmala Sitharaman-ia lai benokba budget pusema olen kar jembia.

Opposition-i taküm Union Budget ya NDA den yariteper Bihar aser Andhra Pradesh dak temulung agüja yanglu ta aitsür.

"Budget onük jembidang senotsü lemsaba tera dang shisemer aser state ajak pei pei tata lemezükogo" ta Sitharaman-ia ashi.

"Ni 2004-05 nungi budgets

meypa repringdangogo. 2004-05 budget onük nung state 17 medensem. 2006-07 nung state 16 medensem aser 2009 nung Bihar aser UP dena state 26 medensem. Anungji UPA sorkar kümsük nung item state nem senotsü magütsü asü" ta Sitharaman-ia asüngdang.

"Budget onük jembidang state ka mezüngsem ajanga iba state nem senotsü magütsü ya masü. Iba amaji mejembitsüla" ta laisa ashi.

"State ka mezüngsemba agi senotsü melemzüksür ta jembiba

ajanga nüngdak maliba tetsübu aser terata adokdaksür. Tesüba kümtem minister temi state aika sema senotsü lemezüksüba osang metetpelaogo, anungji budget nung mezüngsemba state nem senotsü melemzüksür ta asübaji tai lir" ta Sitharaman-isa ashi.

Hombarnü Leader of the Opposition Rahul Gandhi-ia Parliament nung budget atema sorkar anema jembia liasü.

Rahul-ia budget nung mebenokba onük kar ashi aser paper leak o caste census indang jembia.

CEO KSCDL K Theunuo-i Kitsubozou Panchayat ki semzüktsü



Kohima, Chiteni/July 30 (TYO): Kohima Smart City Development Limited (KSCDL) indang Chief Executive Officer (CEO) K. Theunuo Mongulbarnü Kitsubozou Panchayat, Ward No. 5, Kohima indang multi-purpose building tasen ka semzükja liasü.

Iba sentong nung jembidang Theunuo-i Kohima ya Smart City ta sangdongba bilemteta jembidang, nüburtemi state yimtiba nung terenlok aser temelenshi angutsü teimla liasü, saka ali peria maliba ajanga ibaji matalok, ta ashi.

KSCDL ajanga develop asütsü atema Union Ministry ajanga ali acres 285 dang approve asü aser yangji Midland, Daklane, D Block, NAgabazaar, Kitsubozou, North Block Keziekie aser New Market dang liasü ta ashi.

Mezüngbo KSCDL ajanga infrastructure balala, Kohima atema libajen temürek asoshi sen crore 1000 indang project benoka liasü saka Centre aser State sorkar tsüngta 50:50 funding pattern aliba ajanga

takok mongutet, ta pai ashi. Saka senotsü nung tebilemtsü aliba ajanga ministry-i northeastern aser tenem aliba state tem ajunga atema funding yimya ya 90:10 yanglu aser iba yongji KSCDL ajanga project ya sen crore 550 dang melen.

KSCDL ajanga wards tenet atema multi-utility community building atema maparen tenzüka pongu renemogo aser ana merenemi lir, ta pai ashi.

Project tasazük balala lir aser ali anguba nung ajemdaker sen lemezüktsür, kong Daklane ya tilatiba aser D Block ya tulutiba ta pai ashi.

Kitubozou Panchayat nem ali tasazük 7000 sq. ft. nung iba ki yanglutsü atema sen crore 3.5 agütsü aser colony lenirtem, contractors aser KSCDL ketdangsurtemi mapang shidak nung iba project renem, ta pai tenüngsang agütsü.

Building tasenba ground floor nung car parking lir, first floor nung takdang balala lir aser floor tanabuba nung community hall lir.

Iba ki ya pei colony nung panchayats temi revenue

sharing yimya nung project sen tanaben mangu tashi ketdangtsütsü, ta pai ashi.

Iba atema pai municipal tenet nungi ketdangsurtem dang item ki kanga junga anepalua amshitsü ayongzüka liasü.

Ki tasenba yagi basic facilities agütsüba kisüng masü saka Kitsubozou nung lenirtem aser nüburtemi tsüngta telungjem aser amalitep tali alitsü imlar, ta Theunuo-isa ashi.

Iba sentong nung Kitsubozou Panchayat finance secretary Aziebou Theyo menden liasü, CBCK indang senor pastor Rev Dr Kevekhalo Lasuh-i ki meshiteta sarasademtsü, Panchayat chairman Dzieseneile Sachü-i pela agizükba o jembi aser general secretary Atoulie Mechülho-i melepzüng o jembia liasü.

Sentong nung Khriephrenuo Mepfhü-o ajanga temeja ken ka aten.

Iba sentong nung Ward-5 nungi KMC councilor Vimhalie Pienyü, taoba MLA Dr Neikiesalie Kire aser Medo Yhokha aser ward balala nungi lenirtem dena liasü.

Kohima Press Club ajanga asükhu lemsateper

Kohima, Chiteni/July 30 (TYO): Dimapur Press Club nung Information and Publicity Secretary Kanili Kiho tebu Suhoje Kiho, July 29, 2024 nikonngang Dimapur nung asüba osang angashia mangyim-jashi lemsateper, ta Kohima Press Club (KPC) sangdong ka ajanga ashi.

Mangyimer kibong nung tang

tejashi aliba asadangtsü makok, saka nenok den külemi mang ayimer aser nenok mulungjang nung anisüngzük angutsü sarasademtsür, ta ashi.

Nenok mangyimba mapang anisüngzük angutsü aser nebu tanüla tesunep nung anisüngzükjang ta sarasademtsür, ta KPC sangdong ajangasa ashi.

Noklak nung World Day Against Trafficking amung

Dimapur, Chiteni/July 30 (TYO): Noklak indang District Administration ajanga DHEW Noklak aser Hope Channel Dimapur den lungjemer "Leave No Child Behind in the Fight Against Human Trafficking" omen nung ajemdaker July 30, 2024 nü World Day Againts Trafficking in Persons anogomung nüngtem nung sentong ka ayongzüka liasü.

Iba sentong nung shisalen sayur ya Prodigals' Home, Dimapur indang director K. Ela liasü.

Lai iba sentong nung jembidang nisung shibelenba aser ibaji ajanga lokti nung timtem ajuruba indang awareness agütsütsü nüngdaker ta shia asangsang otsü aser parnoki ajangshibatem lemsatepa liasü. Ela-i stakeholders tem dang nisung shibelenba yimya ajak samadaksütsü asoshi meranga inyaksü ayongzüka liasü.

Deputy Commissioner,

Noklak, Arikumba-ia nisung shibelenba tebilemtsü indang lemsatepa liasü.

World Day Against Trafficking in Persons ya United Nations pangzüng ka ajanga tenzüka 2014 nung mezüng among.

United States-ia nisung shibelenba aser alar ama amshiba atema awareness agütsütsü mechi 2007 nung National Human Trafficking Awareness Day tenzüka liasü.

Tila tanurtemi iba timtem ajuruba nungi kumzüka ayutsü aser tanur shibelenba anendaksütsü asoshi tekeraba nung mera agitsü nükjidong nung takum iba anogomung ya among.

Tanurtem ya tashiyim amshia mapa inyakdaksüba, mapa tamajung inyakdaksüba, meshimetsüdaksüba, ozüng alema adopt asüba, online nung yimya balala ajanga timtem agüja timtemba ajiteta iba anogomung ya amunger.

Nagaland Angh-i Naknyulüm benjong salem lemsateper

Dimapur, Chiteni/July 30 (TYO): Chang nunger adianu aser adianutsürtem dangi Naknyulüm benjong salem abener, ta Nagaland Angh La Ganesan-i sangdong ka ajanga ashi.

Tamajung madak tajung agi takok anguba, tammang nungi tekumzük anguba aser alu mezüng ruzükba benjonga iba

benjongmung ya amunger.

Kasa mapang tembar aser kinungertem den sempet aser chiyingsü tem lemsatepa tesendaktep tali akangshir.

Iba Naknyulüm benjongmung ajanga nüburtemi tsüngta yimjung aser telungjem bener arudakjang ta sarasademtsür, ta Nagaland Angh-isa ashi.

WSH-i sorkar dang Aghunaqa aluyimer yaritsü ajungshir

Dimapur, Chiteni/July 30 (TYO): Western Sümi Hoho (WSH) ajanga state sorkari dang Aghunaqa, Niuland district nung aluyimer timtemba ajiteta yaritsü ayongzük, shirnok küm pezü-pongu timtema arur.

COVID-19 den alimar lendong balala aser tawa tzünglu kanga sashia aruba ajanga parnok temeimtsü tia nung lir, ta ashi.

Tawa tzümetsüng adokba

ajanga parnok alu, ki o jen, takum yariba lenmang ajak nung timtem ajurua lir. Parnok lenmang balala nung takoksa ajurua tang tashi shisabulu agi sünger lir, aser parnoki tekeratiba nung teyari nüngdaker.

Aluyimer timtemba ajiteta tekeraba nung yaritsü asoshi state sorkar dang ajungshir. Parnok tzümetsüng agi teraksa balala bener arutsüba asadanga

aluyimer nem teyari agütsütsüla, tarutsü nung iba ama timtem majurutsü asoshi mera balala agitsüla, ta WSH ajanga ashi.

Aluyimer tem yaria parnok takum tanaben ajungketja aluyimba maparen nung asendenshija yaritsü kanga tongtipang lir. Anungji sorkari tekeratiba nung parnok den akokba lenmang agi yariteptsü ajungshir, ta Western Sümi Hoho ajangasa ashi.



Tuli nung tzünglu kanga sashia aruba sülen Aopenzu nung tzümetsüng adoka aliba noksa nung angur. Tuli Sub-division kübok Aopenzu yimdam Mongulbarnep nungi tzümetsüng adoka lir. Iba tzümetsüng ajanga tzülü 10-15 tsüngta raksatsüogo aser yimtsüngi aoba lenmang aser ki kar tera raksatsü, saka tia ka nisung asü-amababo mali.

Kohima DTF ajanga Single-Use Plastic nokdangtsü

Kohima, Chiteni/July 30 (TYO): Kohima District Task Force on Single-Use Plastic (SUP) pur senden ka Deputy Commissioner, Kohima indang Conference Hall nung July 29, 2024 nü mena liasü.

Deputy Commissioner aser DTF chairman, Kohima, Kumar Ramnikant, IAS lenisüba kübok mena Nagaland sorkari single-use plastics nokdangba mapa kuma inyaksü asoshi jembishinüa liasü, koba August 1, 2024 nü nungi mapa kuma amshitsü lir.

Kohima nungi single-use plastics samadaksütsü atema sorkari totuyuba agüja aliba shidak amshitsü nüngdaker, ta Ramnikant-i ashi.

Iba ozüng shidak mapa kuma inyaksü atema DTF on SUP ajanga küm nung asembe senden amentsü pangjem aser iba tenokdangba inyakyim asadanga amentsü lemtet.

Single-use plastic carry bags aser litre ka tekübok tzü aser soft drinks atema single-use plastic bottles trem nokdangba indang sangdong ka DTF on SUP, Kohima ajanga agütsütsü. Aser iba sangdong nung ozüng sülen manidaker dang senchi aser temerenshi balala tejangja keter

agütsütsü.

Kohima Town nung nokdanga aliba SUP oset ayokba azüoktsü atema inspection team ana iba senden nung tenteta liasü. Mezüngbuba inspection ya August 10, 2024 meta agitsü lemtet. Iba mapang apuba SUP osettem indoktsü atema Kohima Municipal Council (KMC) ajanga anepalutsü lemteta liasü.

Sub-Divisional level nung Administrative Officers temi pei aliba tesem nung item tenokdangba mapa kuma inyaksü aser district kübok tesem ajunga nung kasa inyaksü.

Nüburtemi nem awareness agütsütsü atema All India Radio aser DDK Kohima ajanga KMC den lungjemer SUP nokdangba indang media coverage agütsütsü. Iba den külemi DPRO Kohima ajanga public address system amshia colony aser ward balala nung iba tenokdangba sangdongtsü lemtet.

SUP osettem rizünga aliba aser supplier temi item oset amshiba nokdangtsü kanga tongtipang ta senden nung jembia liasü. Kohima ya plastic maliba jila ka kumdaksütsü asoshi parnoki mapang shia meita aotsü lemtet.

Kerala anentsüh lendong nung nisung 98 asü



Kerala kübok Wayanad district nung Mongolbar anepdang anentsüh tulu ka aluba sülen NDRF personnel temi nürburtem kümzüksü atema jenjang agiba noksa nung angur. Indian Army, Air Force, NDRF asertanga sorkar agency tem yoka tekümzükba maparen inyakdar.

New Delhi, Chiteni/July 30

(Agencies): Kerala kübok Wayanad district nung Mongolbar anepdang anentsüh aluba sülen nisung 98 süogo aser aika sabanga alitsü ta tsübua bilemer.

Tekümzükba maparen balala benoka inyakdar, ajisüaka tzunglu kanga sashia aruba aser tongtibang aputem chirepba ajanga tetsükdaksü adoker.

“Tensa kanga mejungi lir aser lendong nung asürtem timba akümsü akok,” ta state indang civil servant V Venu-i ashi.

2018 küm tzümetsung tesashi arua nisung 400 dak tema asüba sülen Kerala nung tang mezüngbuba lendong tulu ka atalokogo.

Ketdangsürtemi ashiba agi, tekümzükba maparen balala nung security force tem nem teyari agütsütsü atema army 200 dak tema yokogo.

Chief Minister Pinari Vijayan-i osangbenertem den sensaksemba mapang ashiba agi, Mongolbarnü anentsüh aluba ajanga tesem ka ajunga anenzüka benerogo.

Lendong atalokba sülen mozüki balala nung nisung 123 dak tema anepaludar aser nisung 3000 dak tema kümzükba relief camp 45 nung jenokdaksüogo, ta pai ashi.

Anentsüh ajanga district kübok Mundakkai, Attamala, Chooralmala aser Kunhome nungera kongshiogo.

Kasa mapang nung chief minister-i nürburtem dang nüngdaka makaba nung Wayanad-i maotsü tetuyuba agütsüogo.

“Kerala bank-i CMDRF nem sen lakh 50 agütsüogo. Sikkim Chief Minister-ia sen crore 2 agütsütsü nangzükogo aser Tamil Nadu CM MK Stalin-ia sen crore 5 teyari agütsütsü tenangzükba agütsüogo,” ta CM-i ashi.

Mongolbarnü CM lenisüba nung high-level senden ka menogo. Senden nung Wayanad nung tekümzükba maparen balala sendaktepa inyaksü aser tenügdakba jenjangtem agitsü asoshi sensaksemba liasü.

Bengal Assembly Speaker anema BJP-i no-confidence motion file asü

Kolkata, Chiteni/July 30

(Agencies): BJP-i Mongolbarnü West Bengal Assembly Speaker Biman Bandopadhyay anema no-confidence motion ka file süogo.

Iba proposal nung BJP MLA 50 pronglai sign sür liasü aser Assembly secretary, Sukumar Roy nem agütsüogo. Assembly nung Opposition lenir Suwendu Adhikari-i anir BJP MLA tem Sukumar Ray indang office-i oa iba onük benoka liasü.

Taoba küma BJP MLA temi Speaker anema no confidence motion ka benok aser iba dak sendakba nung sensaksemtsü atema mepeshia liasü.

BJP party den sendaktepa aliba nisung kari ashiba agi, Assembly secretary nem agütsüba proposal nung party indang legislative team-i Bandopadhyay mapa nungi agintsü asoshi kuli 18

agüja liasü.

Taitsüba rongnung kaji, opposition-i lokti ajanzüksü atema benokba onüktem süaka Speaker-i magizüker, ta shia lir. BJP-isa, Speaker-i Assembly inyakyim dak indang indanga sendaka meliaka Trinamool Congress legislators temi benokba onüktem aika agizükogo ta ashi.

Osangbenertem den sensaksemba mapang Adhikari-i ashiba agi, Speaker-i constitutional provisions tem anema inyaker. “Pa Speaker menden nung mener political party ka tenüng nung inyaksangshir. Pai opposition ola remseptsütsü meranger. Pai tongtibang ken o tem nung House nung jembitsü memelar. Anungji onoki pa anema no-confidence motion ka Assembly secretary nem agütsüogo,” ta Adhikari-i ashi.



New Delhi nung Sarai Kale Khan anasa Bansera nung battery agi inyaksangshiba bus tem tenzüksüba mapang tangokba noksa nung angur. Lt Governor VK Saxena-i, battery bus 350 tenzüksüogo.

Mumbai-Howrah Mail train tsükokba lendong nung nisung 2 asü



Jharkhand nung Seraikela-Kharsawan district kübok Badabamboo anasa Howrah-Mumbai Mail train tsükokba sülen tekümzükba maparen balala inyakba noksa nung angur. Iba lendong nung nisung ana asü aser nisung 20 yirua liasü.

New Delhi, Chiteni/July 30

(Agencies): Mongolbar anepdang Jharkhand kübok Rajkharsawan railway station anasa khu abenba train ka den Howrah-Mumbai Mail train (Train number 12810) tsüktepa sülen train indang coach 18 lenrüi ao aser nisung ana taküm sama liasü.

Railway ketdangsürtemi ashiba agi, iba train tsüktepa lendong nung nisung 20 tashi yiruogo.

Iba lendong ya anepdang Rajkharsawan station nungi km 7 shi pilar Seraikela-Kharsawan district nung anepdang 3:40 ako nung

ataloka liasü. Rajkharsawan station ya South Eastern Railways, Chakradharpur railway division kübok lir.

Jharkhand CM Hemant Soren-i, yirur aliba passenger tem nem teyari agütsütsü atema tetuyuba agüja liasü. “Yirur alirtem temang anepalutsütsü atema tangsa tang jenjang agiang,” ta pai X sabang ajanga metetdaksü.

Bengal CM Mamata Banerjee-ia iba tatalokba dak sendakba nung la tebilemba lemsatepogo. “Hopta shia ama train tsükoka nisung asür aser yirur; kobika aremzüksü?” ta lai X ajanga

metetdaksü.

“Anepdang 3:45 ako shi nung SER indang Chakradharpur division kübok Barabamboo station anasa 12810 Howrah-Mumbai Mail train indang coach 22 rongnungi 18 lenrüi oa liasü,” ta South Eastern Railway otongdari ashi.

Train tsükokba lendong nung asür kinungertem nem sen lakh 10 aser kanga mejungi yirurtem nem sen lakh 5 aser terara yirur alirtem nem sen lakh 1 agütsütsü ta Railways-i sangdongogo.

Iba train tsükokba ajanga train 5 tashi thija liasü.

PM Pham-i New Delhi semdangba mapang India, Vietnam na tesendaktep atsülangshitsü

New Delhi, Chiteni/July 39

(Agencies): Vietnam Ato Kilonser Pham Minh Chinh-i India semdangba mapang linük ana tsüngda digital economy aser renewable energy amala lenla balala nung tesendaktep atsülangshitsü atema sensaksemtsü.

Vietnam PM-i küm ter tsüngda tang mezüngbuba India semdangba aser linük ana tsüngda tesendaktep 2016 küm comprehensive strategic partnership-i ajungketba sülen PM-i tang mezüngbuba India semdangba asütsü. Chinh atema Rashtrapati Bhawan nung sentong ka ayongzükba katsütsü aser August 1 nü India PM Narendra Modi den sensak asemtsü.

Lenir ana sensak asemba sülen linük ana tsüngda tenangzüktepa balala yanglutsü imlar. Chinh-isa, tir Droupadi Murmu, vice president Jagdeep Dhankhar aser external affairs minister S Jaishankar nung dena ajuruteptsü.

Chinh meina ministers, deputy ministers aser business lenirtem aika arutsü. “Act East policy atema Vietnam ya India

asoshi kanga tongtibang tongshi ka ama züngshir aser Indo-Pacific vision nung tongtibang partner ka lir,” ta external affairs ministry-i Mongolbarnü ashi.

Chinh-isa, August 1 nü Indian Council of World Affairs nung annual Sapru House Lecture agütsütsü.

India dangi Vietnam indang ambassador Nguyen Thanh Hai-i Vietnam News Agency dang ashiba agi, Chinh-i India semdangba ajanga linük ana tsüngda tesendaktep akangshitsü. Paise, India aser Vietnam nung lenirtemi linük anaprongla tejangraba dak ajemdaker tesendaktep akangshitsü atema lenmangtem mesapoka ayutsü imlar.

Maneni linük ana tsüngda taoba mapang yanglur aliba tesendakteptem akangshitsü aser ano digital economy, telecommunications, biotechnology, pharmaceuticals, infrastructure, information technology aser renewable energy amala sector tem nunga tesendaktep yanglushitsü imlar.



TIR YIMYIM

YIMOBILEM (EDITORIAL)

DIMAPUR RASEMNÜ, JULY (CHITENI) 31, 2024

Asenokia tenlatsüla

Nagaland nung electric light tashi nungdakba peritsütsü atema 186 MW electric tashi ngutettsüsa Dikhu Hydro Electric Project ya yakatasa mapa kuma inyaknuba agi Nagaland Power Department-i ali kiburtem nungi shir kaketshirtem telongjem tentet tashi jaoka shisalemsatepba mapa yagi department-i iba sentong yabosa takok ngua inyaknuba tangatetba aser tejangraba sayur. Atangji, Nagaland nung tang kanga rongdaka nungdakbaji electric light tashi ya asütsü, kechiyong asenoka joko tesangwa asoshi dang masü saka mapa ajak electric tashi agi inyaker aser tang tashi electric tashi ya tangar dang nungi alia agir aser aji agia meperidaksüteter, anungji mapang ka nung külemi Nagaland ajunga nung light magütsüteter, iba jagi light khen oli, khen aruli ta light agi mapa inyaker tembo anogo shia timtem aser takoksa jenti ajurur. Iba ama electric light peria maliba tesem nungbo asenoki mapa tulu inyaksü aika bilemyonga, industry lapoka aotsü jembiba sentongtem ya khen toktsür, Photostat dokan-a melapoktettsü. Nagaland nung ayong aika lir aser item ayongtem rongnung Wokha district kubok Doyang nung hydro electric project ka lapoka lir saka ibai asenok meyong masü, NTPC NEEPCO (North Eastern Electric Power Corporation Ltd) meyong lir, anungji iba nung jagibo asenoka aliang agir. Iba Doyang Hydro Electric Project nungi adokba light tashi ya 75 MW dang lir, anungji ajakji asenok agi nunga tang ama tatsük mapangbo meperitsü. Atangji, Nagaland kümer joko küm 60 süir, saka tang tashi asenok meyong Hydro electric Project nungi tangar dang mayokyonga asen peribo agitettsüsa meinyaktetbaji Nagaland state government tamakoktem rongnung tulutiba ka asütsü. Shitakba agibo aji ali kiburtem dang atongtsüa mali aser nübortem aitsütsüa mali saka tamakokji yimten tamakok asütsü. Iba jagi tanü belemer. Tanga state nungbo küm shia state government senotsü sentong yangludang aluyimba, education aser electricity ama mapatem nung ya kasasa temulung agüja senotsü lemkütsür. Aji oda, aluyimer aser sensakertem nem teyari agütsüba ya sen dang nungibo electric light tashi jenjang dalang agi angati bensaa agütsüba agi alu mapa melamelaa inyakteter. Kasaji kaketshirtem aser lanurtem asoshi nungdak mapatem nung electric tashi jenjang tajemba nung amshitettsüsa jenjang dalang agi talubo agütsüba ajanga sensaker chirnurtema timmedemi kaketshisatsü bushitetter. Aji oda, mozü kitem nunga electric tashi jenjang tajemba nung talubo agütsüra shirangertem yariba jenjanga tajemba akümer. Iba amaji electric light tashi kisung peria akaba ajanga tanga nungdaktema ajak peria ngutettsüsa inyakteter. Item nungdaktemji reprangteta tanübo government-i dang masü saka nübortemi dena asen lima nung asen peria electric tashi adokdaksütettsüsa ayong aser ali akartemibo mulungsua Nagaland asoshi tenla agütsütsüla. Asenoki lenmang tajung aginür saka alibo tilakata magütsüner, tzü tajemtsü ki tonga arudaksüner saka asen li nungbo tank tilakata mamenokdaksüner, electric light amang-sangwa methitemi kena manen arudaksüner saka asen li nung hydro electricity project yanglutsübo memelaner ta süra asen Naga lima ama ali kibur nem temelaba magii terenlok mapa meinyaktettsüba limabo kodanga tangar menepa terenlok maparen nung tejakleni moutettsü. Tangarbo terenlok mapa inyaker saka ali maka, aluyima takar kuma linür saka aluyimtsü ali maka ta mapa meinyaknuba aser ali magütsünüba tebilemstü masü saka ali makaba tebilemstü agi anogo nung khen chiyongtsüa mangu timtemer aika lir. Ajisüaka, asenokbo asen nungdak dang tali asenoki tangar asoshia renemtettsüsa Tsüngremi asenok nem alima tajung tuluka moaja lir. Itemji asenoki asen lima aser nübortem nungdak asoshi mekorui tenlatsüla. Atangji, government-i alimenok jenjang dalang agütsütsü aser hydro project-ji ali tashi ayangtsüsa mapa tajung angutsü. Ano, nungdakra government-ibo tanga tesem nunga ali temelen alia agütsütettsü. Ajisüaka, item tajangzüktemji bilema masü saka Nagaland-i asen ali aser ayong nungdakba agi Naga nungger nem ali kiburtemi tenla agütsür ta bilema agütsütsüla. Iba tangatetba tenla jagi dang Nagaland Independent angutsü.

OLEMSABANG

MAPA MEINYAKI CHIYUNGA-JEMA LINÜBA KIN

~ L.Kika Pongener.

(Yashi adok nungi...)

Asen lima nung teimba ka dak aketba yimya supaba kaji, Sorkar tenzükertema karbo office-i mao ser itasen agizüka agitsüba, Contract & Supply mapa kari inyakra, mapa shitak/junga meinyaki Bill agizüka agitsüba, linuk terenlok mapa inyaksü atema agütsüba sen, karibo tiyazü Project/Bill yanglur mimzuka agia alitsü akok. aji oda, iba ama ochimashi inyaksübaji tim amai bilema inyakteper. Ibajagi, asen lima nung lenmang Black-topping mapa inyakba-a mapa renemer küm ka mesuidang, lenmang ajak akhi ama dang kuma raksar. Shitakba-bo Center sorkar-i asen Naga lima atema sen yokba ya shisadanga, asen lima dak malangba sen agütsür ta ashitsü akok. Anungji asen lima yabo sentsüperanga menoker alitsüba. Asen lima nung mapa meinyaki tajangzük agitsü yimya supaba ya, kodang nungi kodaser tenzük (?)...ta bushidangra, 1970's nungi 1990's mapang tashi ka nung Center Sorkar-i asen Naga nungger nem sen yala-yashia agütsü, aser iba mapang nung lanurtem aika Contractor & Supplier aküm aser mapa shitak/junga meinyaki angadi sen agizüka agitsü angazüktepa yimya supaa ao. Ano Dimapur nung kodang Sugar Mill lapok iba mapang nungi, Sugar Mill nung Rum yala-yashia yangluba agi, lanur aika nem yi ayokba Dokan lapoktsü License anong aponger amai lemaa agütsü. Aser Naga lima jila tulu ajak nung yi Dokan mera ishika tetsüngda nunga lapokyonga ao. Aser Naga nungger lanur aika takar aküm aser asentsü sena mapa meinyaki chiyunga-jema alitsüba yimya supa-a aküm. Aji oda, Center sorkar-i sen aika agütsüba agi terenlok mapa inyakba dang nungibo mapa meinyaki tajangzük agitsüba-ang talila yimya supaa akümba tuluba liasü.

Tanüa Center nungi Ration Card alir nem jang (Rice) angadi agütsüba ya, akhidangpo iba jang ya angadi masü, sen dalang agi agüja-a aru. Ajisuaka, COVID-19 agi Lockdown asüba mapang nungi, Sorkar-i iba jang ya angadi lema agütsütsü tenzük aser tanü tashi agütsüa arudagi. Shibai metet (?) Lok Sabha Election agitsü aliba agi angadi maneni agüjaa aru sudi. Jokorla, Election tema-dokerji, ashiko, angadi agütsüba ya anena-adoktsüa akok. Tamalenbo Ration Card nung jang (Rice) dang masü, Dal, Jana, Atta, Maida, Kerosene Oil, item ya-a agüja liasü, saka küm ishika tejaklen nungi ajia mongui anena-adok. Aji oda, Center Sorkar-ibo agütsür sernung State sorkar-i magütsür asü (?) Mesura Center Sorkar-ia magütsüi anena-adok ta nubur aikati rataa bilemer...??? Tamalenbo yimtsüng/colony/sector shia nung GB-temi acha-ayanga Kerosene oil kibong shia agüja liasü, saka küm ishika joko ajia mongui anena-adok.

Naga nungger karibo Ration Card jang dang ya Modi-ba jang ta ajar, kechiba sura Modi-ba sorkar mapang agütsüba agi ajar sudi...Saka ya Modi-ba jang masü nubur meyong jang, asenok tangutsü tim shitak angurba dang. Aji oda, shir sorkar mapang, yimsusur shir lenisuba mapang agütsür, parnok tenungji tetshir asünung...Modi-ba jang ta ajaba-jia tim dang ta sudi. Atangji, Naga nunggeri mapa meinyaki chiyunga-jema linur, office/mapai moi itasen aginur, belema meinyak ser angadi tajangzük aginur. Anungji 'Angadi' anguba jang ya kanga pelaseta agizüka chiyunger, saka kanga junga shisadanga, angadi jang yagi asenok azümesen dendaktsüba, mesura mapa meinyaki chiyungtsüba yimya supaba ka mekümdaktsütsüla. Center Sorkar-i sen aika yokba agi, asenok mapa meinyak ser tiyazü Project/Bill yanglua sen agitsüba yimya supa-a akümba ama-to, angadi anguba jang yagi asenok azümesen akümstüba yimya supaba ka kümdaktsüra...Tajangzük melena takoksa-ang asütsü. Anungji angadi anguba jang yagi, asenok azümesen kümdaktsüba yimya supaba ka mekümdaktsütsüla. Asenoki tang nungi danga mapa meranga inyaker chiyunga-jema alitsü tenzükdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung March ita tekülem sentong anendaktsüba video tanaben temai adok

Surabaya, Chiteni/July 30 (Agencies): March ita Muslim nunger temi tekülem sentong ka anendaktsüba video tanaben temai adokba atema sasar, ta Indonesia nung ketdangsür temi ashi, kechiaser ketdangsür temi iba arogo nem khen atema tekülem sentong agia atatsü tesem agüja lir.

Tangerang Regency government indang Soma Atmaja ajanga agency indang website nung ashiba agi, par administration-i Banten Province nung aliba Thessalonica Church nem khen atema tekülem agia atatsü tesem agüja lir, kechiaser parnoki amshia aliba tesem nung building permit mali.

Iba arogo ya taoba mapang tekülem sentong ya Jakarta tezülen Puri, Kampung Melayu Timur Housing, Teluk Naga Subdistrict, Tangerang Regency nung temelaba makai taa agüja amshiba ki ka nung agia liasü, ta Soma-i ashi.

July 21 nü mezüng temai adokba video ka nung tebur timba sür nisung telok ka Indonesian Muslim nungeri asemba süoshi agir iba tesemi aita tekülem sentong anendaktsü aser ibai Muslim nunger timba aliba tesem ka lir ta shia liasü. Parnok yagi taa agüja amshiba ki ka nung tekülem sentong agiba atema atalaja liasü.

“Muslim nunger timba aliba

tesem ka nung nenok tekülem sentong agir!” ta nisung kati ayimten aser iba mapang nisung kati jihadist yimyim “Allahu Akbar!” ta ayomoktsü.

Arogo züngsem kati kidang tekülem sentong agiba kuli agütsüba sülen lokti ola tuluba adoka parnok dang tekülem kidang dang sentong agitsüla ta ashi. Puri Naga Indah Complex nung taoba mapang tekülem sentong agia aliba mapang telatet tembangogo ta arogo züngsem kati ashidang teloki parnok menütsü.

Iba rarapangsen video ya kechiba taoba hopta ang temai adokar mangateter, ta Teluk Naga Police Chief Wahyu Hidayat-i ashi.

“Ibai tatalokba tejen, ita asem jakdang atalokba lir,” ta Wahyu-i national news channel Medcom dang ashi.

Iba mepetmesü tajungtiba nung angatettepogo, ta pai ashi. Indonesia indang Joint Ministerial Decree 2006 ajanga tekülem sentong agitsü temelaba ya teti amshiba tesem nem dang agütsü aser kibok tekülem madentsü ta shia lir.

“The Joint Decree of the Two Ministers, Chapter 1, Article 3 nung tekülem ki ka yanglutsü atema permit nungdaker. Kidang, shop-houses aser cafes nung tekülem sentong agitsü atema temelaba menüngdaker,” ta rights activist Permadi Arya (Abu Janda)-i

2023 küm zülua liasü.

Iba amala ki, cafes aser shop-houses nungya Muslim nungeri sarasademer, aser Muslim nungeri item atema temelaba menüngdaker asünungji Khristan tem nema kasa temeden agütsütsüla, ta pai ashi.

Indonesia nung Joint Ministerial Decree of 2006 ya ozüng kuma agizükba sülen Islamic extremists temi tekülem ki shibangtsütsü aser anema mapa tamajung inyaktsü atema building permits maliba tenüng amshir, kechiaser iba ozüng yagi iba amala permits angutsü ya khenyongi tamakoktsü kumdaktsür.

Arogo tila aser tasen temi nungdakra ama arogo züngsem 90 aser yangji aliba tamangba yimsü balala amanger kibong 60 nungi temelaba nguaka ketdangsür nungi telangzüba kanga menur agütsür mesüra magütsür.

Khristanpur yariba lokti tentet Open Doors ajanga alima nung Khristanpur alitsü linük tamajungtiba 50 asadanga 2024 World Watch List nung Indonesia ya jenjang 42 buba nung lir.

Indonesia loktiliba ya conservative Islamic yimya nung lir, aser arogo temi evangelism mapa inyakba nung Islamic extremist teloki tenük yoker timtem balala agütsür, ta World Watch List ajanga ashir.

MP nung Christian school ka telung nung Hindu nunger tsüngrem noksa yutsü

Jhabua, Chiteni/July 30 (Agencies): Tang sorkar timsü tesüdak aser Hindu nunger bhukumba party indang student wing ajanga central Indian state ka nung Christian school ka telung nung Hindu nunger tsüngrem indang noksa yutsüba asoshi Khristan lenirtemi aitsü.

India nung sorkar kumteta aliba Bharatiya Janata Party (BJP) indang student body, Akhil Bharatiya Vidyarthi Parishad (All India Students' Council) nungi activists 50 shi July 27 nü Madhya Pradesh kübok Jhabua diocese nung St. Peter Higher Secondary School telungi ait.

Parnoki school telung nung St. Peter aser Mother Mary indang kerakyanglu agienang ta ketdangsür nem takhangba agütsü aser goddess Saraswati indang noksa inoka yutsü, koba Hindu nunger tamangba yimsü kübok ‘patron of knowledge’ aser Bharat Mata (Mother India) ta züngshir.

Parnoki iba noksa mindoktsü ashi.

“Ibai teblemetsü khuret tulu lir,” ta Jhabua indang Bishop Peter Rimal Kharadi-i ashi.

Küm 25 dak tema shisalook sayuba kakat reju dak tenük yokba atema putiri aitsü.

Tesüiba anogo 30 tsüngta ibai tatalokba tanabuba alitsü, ta pai July 29 nü UCA News dang ashi.

Mansuar district kübok St. Thomas Higher Secondary School nunga June 27 nü Akhil Bharatiya Vidyarthi Parishad (ABVP) züngsemtemi timtem agüja liasü.

Parnoki school tem nung timtem agütsütsü atema June 27 aser July 27 shimtet. Ibai jelia sentong yangluba inyakyim ka lir, ta iba arogo indang public relations officer Father Rockey Shah-i ashi.

Madhya Pradesh kübok underdeveloped regions nung shisaliok agütsüba Christian school tem nung timtem agütsütsü asoshi kanga junga sentong yanglur inyakba lir, ta Shah-i ashi.

St. Thomas nung ABVP ajanga ayongzükba sentong ka nung kakatshirtem tendaktsünüa liasü. Iba school indang principal-i memulungba yong parnoki long agi aon aser school raksatsü, ta putiri ashi.

Parnoki school ajungketa aliba shilem kar aser kishi raksatsü, ta Bishop Kharadi-i ashi.

India nung minorities rongnung Khristanpur ya

Muslim, Buddhists, Jains, Sikhs aser Parsees tem den züngshir. Constitution nungbo parnok indang kakat reju nung pei mulungba tamangba yimsü amanga aser sayutsü temeden agüja lir.

“Onoki ozüng alema kecha meinyaker. Ibai minority school ka lir,” ta Shah-i ashi.

Tatalokba anaprong nung Madhya Pradesh nung aliba police temi mapa tamajung inyaker tem yarir, ta putiri ashi.

Iba state nung Ato Kilonser Narendra Modi’er BJP-i yimsü asür aser anti-conversion law renema amshir.

Madhya Pradesh nung putirtem, tekülem agiba tesem aser kakat reju tem nung timtem agütsüba densema Khristanpur merenshiba tali akumer.

Madhya Pradesh nung Catholic Church indang dioceses toku lir aser shisaliok aser healthcare tsütsü parnoki shilem tajung agia arur. India nung tribal nisung timtiba Madhya Pradesh nung lir.

Missionary temi tribal nisungtem aser danga makamaiter ajangzüktsüsa mapa inyakba BJP-i anemer, ta arogo ketdangsür kati ashi.

(Maneni tapak 8 nung...)

ANOGO ABEN TSÜNGREM DEN

Telemtet Tamang

“Anungji tamangbaji tangashiba nungi arur, aser tangashibaji Khrista o nungi arur” (Rom. 10: 17).

Tamangertemi Tsüngrem dak amangba nung rarateper, ibaji parnok tamang nükrangdong nung tashi maitba agi masü. Ibai tamangertemi Tsüngrem nungi tali imlaba nungi adoker. Parnoki bilemba ama, Tsüngremi langzüksü imlar, aska aji matalokra, Tsüngremi parnok amadok ama bilemer..Saka Tsüngrem memelenshir; Paji dang tabensa tamang nükrangdongji lir. Kodang tamang nükrangdongji tai südir tamangji mataloker.

Nai Tsüngrem dak amangba tamang renloknüra nai Tsüngrem aser Pa o angatetba nung renloktsüla. Nai Tsüngrem aser pa o nung angatetba tila süra, ne tamanga tila asütsü. Ne tangatetba yari ne tamang alitsü. Mesüzükba agi tamang ulutsü makok.

Tsüngrem indang nai kechi metet iba alema tua inyaktsü merangbaji metendangi merangba asütsü. Ne tamang renloktsüba lenmangji nai Tsüngrem metetba aser ne tamang nükrangdongji dang lir (Rom 10: 17).

Tsüngremi ne tamang melatetsür, saka ne temetetba ajanga lateter. Maneni Lai bushiba, Lai bushiba nung shilem agiba, mesüra shisadanga ajanga ne tamang renloker.

Nai tesangra o agi sarasademba ajanga Tsüngrem mesüzüktsü makok. Tsüngremi kechi sangdong iba nung amangang. Amangba agi Tsüngrem o-ji ochi kumdaktsür masu, saka Tsüngrem o-ji ochi, iba jagi asenoki amanger.

Rev Hkalam Samson ya tanaben apuba masü: Myanmar mitkar

Naypyidaw, Chiteni/July 30 (Agencies): Myanmar nung Kachin Baptist Convention tepuokdak nungi chiok, shiba chiokba sülen April ita tanaben pua liasü.

Rev Hkalam Samson ya Myanmar nung Kachin ethnic minority nungi human rights advocate ka lir aser pa 2022 küm December ita mezüng apu.

Rev Samson ya Kachin National Consultative Assembly indang mendenpuba lir, aser iba telok yagi tamangba yimsü aser civil society telok balala political organizations den lungjemdakja Kachin temeden ajungketdaksür.

Ozüng alema lokti balala den sendaktepba, ozüng anema nokdaksü ajungmesoba aser counter-terrorism ozüng nung tai tonglokja pa taoba küm April ita apu aser tepuokdak küm trok alitsü obendang agütsü aser general amnesty kübok Rev Samson ya taküm April ita chioksaka ghonda ishika lir ano tanaben apu.

Pa tanaben apuba sülen Myanmar nung ruling military council indang odongtar Maj. Gen. Zaw Min Tun-i pa tanaben apuba masü saka yimjung inyakyim atema jembishinütsü aser amalitep akatsü atema anir ao, ta ashi.

US Embassy in Burma ajanga sangdong ka agütsüba nung Samson chiokba Washington-i pelashishia agizüker, ta US State

Department indang odongtar Matthew Miller-i shia liasü.

“Pa kidangi tanaben meyipa shilangtetba atema pelar aser pai maneni tongtipang mapa inyaktsü,” ta Miller-i ashi.

“Mitkari aja küm trok tepuokdak ayutsü obendang agütsüba nung Reverend Dr Hkalam Samson küm ka dak tema tepuokdak yur chiokba atema United States-i pelashishia agizüker,” ta sangdong nung ashi.

“Rev Dr Samson ya tejangja aser ajaki akumtsüboboba tamangba yimsü lenir ka lir, shibai ajak atema freedom of religion or belief densema tasü ita mapa balala inyaker.”

Myanmar nung ethnic aser religious minorities indang human rights atema Rev Samson-i anir inyaka liasü aser mitkar temi tashiyim amshia ethnic minority pur merenshiba indang jembitsü atema 2019 küm White House nung US Tir Donald Trump ajurur rongnunga dena liasü.

Pa Thailand-i temang reprangi aotsü renemshiba mapang December 2022 nung mezüng pua liasü.

Buddhist nütsüng timba aliba Myanmar nung Khristanpur shilem 6 shi lir.

Human rights telok temi ashiba agi 2021 küm nungi mitkar temi yimsü asü tenzükba sülen Myanmar nung Khristanpur ama religious minority pur kanga reshikangshia amshir.

**AO OSHI ANGAZÜKDAK:
TANÜ ANGAZÜKTSÜBA OJANG**



Taküm

(adj) iba küm (this year)

* Taküm 2024 küm yasa tatsükba lir.

Takümliruren

(adj) taküm aliba tapu meyina, takümliba ajak (biodiversity)

* Kaketshirtemi takümliruren indang jungjunga angateta metettsüla.

OLONG PAITEP # 6861

1									
			6						
		7		8					
9									
			13			14	15		
16									
			19			20			
21									
24									

TIPLÉN

- 1. Saku - (4)
- 6. Songjen - (7)
- 7. Mali/Tazüng - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzüngludenkülemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. - - - tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6860 TELANGZÜBA

TIPLÉN :

- 2. Pongsen, 5. Lepko, 7. Omen,
- 8. Maangka, 10. Yangkhu,
- 12. Senpong, 14. Angu,
- 15. Raksa, 16. Arameso

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



2024 Paris Olympics nung arishi küm 58 tain Zhiying Zeng-i table tennis nung shilem agir. La ya Chinese-Chilean nisung ka lir aser Chile tenüng nung asayar. Zeng ya China kübok Guangzhou yimti nung aso aser tetsü ya table tennis coach ka liasüba agi la tanur asüdüng nungi table tennis asayatsü tenzük.

La arishi küm 11 asüdüng sports academy nung alitsü tenzük aser China nung junior national champion aküm. Zeng arishi küm 16 asüdüng Chinese national team nung züngsem. 1986 küm Zeng arishi küm 20 lia 1988 Seoul Olympics nung rules melenshi aser iba jagi lai shilem magitettsüsa aküm.

Zeng Zhiying-i 1989 küm China toksür Chile nung table tennis sayutsü atema ao. Iba sülen küm 35 lir la arishi küm 58 nung taküm Paris Olympics nung shilem agir.

Yaküm Santiago nung Pan American Games nung lai bronze medal anguba ajanga la kanga nüngtugu aküm.

Okadaki Hmar lanurtem asüba report meshir

Guwahati, July 30, 2024
(Agencies): July 17 nü Assam police-i khaset ta tai tonglokja aliba Hmar lanur asem indang chemical analysis report tekaratiba nung inyakang ta Gauhati high court-i Assam sorkar nem tetuyuba agütsüo.

Justice Kalyan Rai Surana aser Justice Soumitra Saikia na adenba bench-i August 2 tashi tasümgangtem ayutsü tetuyuba agütsü.

Assam sorkari August 2 nü matongdang final report agüjang ta okadakisa ashi.

"Directorate of Forensic Science (DFS), Assam, Kahlipara nungi chemical analysis report mangu tashi post-mortem report ano metembang lir. Anungji state sorkari iba report tekaraba nung inyaksüla aser tasüba kuli tejangja agütsütsüla" ta GHC-i ashi.

Hmar lanur asemji Lallungawi Hmar (21), Lalbiokkung Hmar (33) aser K Joshua Lalrinsang (35) nunger ta jangjaogo aser parnok ya July 17 nü Bhubah Hills nung Assam police den khatepdang asü.

July 19 nü tasür kibongtemi FIR ka benokba nung parnok asüba atema bushisüngdang asütsü takhangba agütsü. Parnoki ashiba agi lanur asem ya telungpurtem masü aser parnok tangalen tepset.

"Lanur asemji July 16 nü Ganganagar Part-VI, Krishnapur Road nung apu aser July 17 nü Kachudharam police station-i anir aoba sülen police ket nung tepset" ta Siemthang Hmar, Lalthavel Hmar aser Lalchunghnung nunger okadak writ petition ka benok.

Assam nunger masü saka tanga doctor temi post-mortem examinations agütsüla ta parnokisa takhangba agütsü.

Tasür kibongtemisa Assam nungi masü saka tangalen nungi police ketdangsür tejen kati iba tataliokba bushisüngdangtsü atema takhangba agütsüo.

Hmar civil society organizations aser kaketshir teloktemi iba tatalokba aitsüo aser Assam police-i "fake encounters" nung nisungtem tepseter ta ashi.

Memungrar



Asür Posemsosang
(10.06.1933 - 05.04.2023)



Asür Kilemsüngla
(20.06.1933 - 31.07.2023)

Mamatetba Tsürabur ana, nuna akümlü wadang tempanger küm ka renteta aodang onoki temulung shirangseta menungra bilemer.
-Chirnurtem, Semlichirtem aser Kinungertem.

India nung mezüngbuba 3D-printed school Arunachal nung yangluogo

Itanagar, July 30, 2024
(Agencies): India nung mezüngbuba 3D-printed school tawa tu Arunachal Pradesh nung lapokogo.

Itanagar nung iba school lapok ta Arunachal Pradesh chief minister Pema Khandu-i ashi.

Pachin nung Government Secondary School mi agi rondok aser ita ana tsüngda 3D printing technology amshia school ki tasen yangluogo ta CM Khandu-i ashi.

"Government Secondary School, Pachin, Itanagar ya India nung mezüngbuba 3D

Assam nung emergency landing facilities 2 lapoknür

Guwahati, July 30, 2024
(Agencies): Centre sorkari Assam nung Nagaon aser Baksa district tem nung national highways ana nung emergency landing facilities (ELF) lapoktsü shidangogo.



Iba ajanga Northeast region nung strategic & rescue operations takok ngua inyaktettsü ta Centre-i ashir.

India nung tang ELF stretches lir aser tang tashi nung asem renemogo aser pezü teyangludak lir

Tang yangluba ELF kabo Assam kübok Dibrugarh district

GOVERNMENT OF NAGALAND
DIRECTORATE OF TECHNICAL EDUCATION
Nagaland: Kohima-797004
NO.DTE/CSAB.NEUT/1/2023 Dated, Kohima the 1st Aug.2024.

NOTIFICATION

This is to inform all the JEE (Main) CSAB-NEUT 2024 appeared candidates that the Spot and final round counselling for CSAB-NEUT:2024 is scheduled on 6th August 2024, at the Directorate of Technical Education, below Nagaland Secretariat, Kohima, against the vacant seats as indicated below. Interested candidates with valid JEE (Main) 2024 score are informed to submit application form to the office of the undersigned on or before 12:00 noon, the 6th August 2024, Counselling will commence by 1:00PM (documents includes: ST, Indigenous Certificate, PRC, Dob Certificate, HSSLC mark sheet, JEE admit card, JEE score card, 3nos of recent passport photographs, BT Certificate and one ID proof (either. Pan Card, Aadhaar Card).

Candidates who have withdrawn their allotted seat of round 1 & 2 as per CSAB-NEUT 2024 schedule are also eligible to participate in the Spot Round counselling. Candidate who did not register for round 1 and 2 are also eligible to participate. The candidate has to pay the seat allotment/acceptance fees of Rs. 5000/- in cash (Rupees Five Thousand only) in the event if he/she is selected in the Spot Round Counselling.

Note: Vacancies are subject to change depending on the number of the withdrawal candidate.

Sl. No	STREAM	PROGRAM	VACANCIES
1	BE/B.Tech	Civil Engineering	4
2	BE/B.Tech	Chemical Engineering/ Technology	4
3	BE/B.Tech	Computer Science	9
4	BE/B.Tech	Computer Science & Engineering	2
5	BE/B.Tech	Electrical Engineering	8
6	BE/B.Tech	Electrical & Electronics Engg	6
7	BE/B.Tech	Electronics & Telecommunication Engg	7
8	BE/B.Tech	Electronics & Communication Engineering	17
9	BE/B.Tech	Mechanical Engineering	27
10	BE/B.Tech	Pharmacy	1

(Er.VIPULHOU LHOUNGU)
Director.



ACHIEVERS ACADEMY

THE DREAM DESTINATION OF ALL NPSC ASPIRANTS

Our RESULTS SO FAR

- 👉 **9 SELECTIONS** IN FINAL MERIT LIST: **2019**
- 👉 **23 SELECTIONS** IN FINAL MERIT LIST: **2021**
- 👉 **50 SELECTIONS** IN FINAL MERIT LIST: **2022**
- 👉 With **65 INCREDIBLE SELECTIONS** IN THE **2023 NPSC MAINS RESULT** RECENTLY DECLARED ON 25 JULY 2024, **ACHIEVERS ACADEMY** HAS YET AGAIN PROVEN ITSELF AS A **FORMIDABLE RESULT-PRODUCING INSTITUTE.**

WHAT MAKES ACHIEVERS ACADEMY THE ULTIMATE CHOICE FOR ALL NPSC COACHING SEEKERS?

- 👉 Besides the **EXCELLENT MENTORSHIP, GUIDANCE, STUDY MATERIALS** and **TOP NOTCH CLASSROOM TEACHING** as evidenced by our **TREMENDOUS RESULTS EVERY YEAR**
- 👉 **ACHIEVERS ACADEMY** is **RUN BY A GROUP OF SUCCESSFUL NPSC CADRES WHO HAD EXPERIENCED THE CHALLENGES AND DIFFICULTIES OF NPSC EXAM AND HENCE DELIVERS AS PER THE NEEDS AND DEMANDS OF THE EXAM**
- 👉 **UNLIKE SOME ALMOST-FAKE COACHING CENTRES**
- ⊗ **WHOSE ADMINISTRATORS HAVE ZERO EXPERIENCE OF THE EXAM**
- ⊗ **DISTRIBUTE CHEAP FREEBIES** like **PRINTERS, LAPTOP** and **E-PAPER** etc **JUST to LURE and DUPE the INNOCENT NAGA ASPIRANTS.**

Wake up NAGAS, ~~*DON'T COMPROMISE YOUR FUTURE for some CHEAP FREEBIES*~~ ONLY AN EXPERIENCED DRIVER CAN TAKE YOU SECURELY TO YOUR DESTINATION.

ONCE YOU JOIN ACHIEVERS ACADEMY, YOU GET CONTINUOUS SUPPORT TILL YOU PASS NPSC EXAM THROUGH OUR

- 📝 **FREE PRELIMS Online Crash Course**
- 📝 **FREE MAINS Online Crash Course**
- 📝 **FREE PRELIMS & MAINS MOCK TESTS**
- 📝 **FREE MOCK INTERVIEW**

OUR CENTRES 📍📞

- 👉 **4TH MILE, NEAR DIPHUPAR 'A' GATE**
8729914953 / 8132888139
- 👉 **CITY TOWER DIMAPUR**
8794510854 / 6009079091
- 👉 **MATO COMPLEX PR HILL, KOHIMA**
9383308709 / 9615224132
- 👉 **ARKONG WARD, MOKOKCHUNG**
9378129625 / 7005526011

ADMISSION IN FULL SWING FOR AUGUST BATCH..ONLY 33 INTAKE... HURRY

20buba Nagaland State Chess C'ship tenzükogo



Kohima, Chiteni/July 30 (TYO): Nagaland Chess Association (NCA)-i ayongzükba 20buba Nagaland Chess Championship, 2024 Mongolbarnü Nagaland Olympic Association office complex nung tenzükogo.

State kübok tesem balala nungi ajak senteper iba asayamung nung asayar 76-i shilem agidar. Iba asayamung ya Chess indang FIDE Laws aser Fide Swiss System dak ajemdaker asayadar aser round teku asayaba sülen Brehostibarnü tembangtsü.

Asayamung nung shilem agirtem rongnung Peren district nungi arishi küm 6 tain Reku Haikam ajak dang tanobusang lir.

Taküm iba asayamung ya Under 14, Under 18, aser

General category ta shilem asem küma lemsar asayadaki. Mongolbarnü NCA vice president P. Khezhie-ia iba asayamung ya tenzükja liasü.

Chess asaya ya millennium ka tejkadang dang India nung asaya-a tenzük. Putu aika süia aoba mapang chess asaya renlokaogo aser alima ajungai prokshia oa skill aser strategy indang universal asaya ka kümogo. Aso 15buba tashi nungbo chess asaya Europe tonga ao, kong asaya melenshi koba tanü alima ajunga nung asayadar, ta pai ashi.

Chess asaya ya sütöksünemtsü atema dang masü saka iba asaya ajanga tekelok techiraba kümdaktsür, cognitive abilities jenjang ajungkettsür aser rasa bilemstü

atema tashi agütsür ta paisa shisem.

Chess asaya ajanga, taremsük, yimayipong azüokba aser tasa tajung yangluba amala taküm nung benshia aotsüba yimyatem sayuba den ochishia tokteptsü aser sportsmanship jenjang tajungba kümdaktsü, ta Khezhie-i ashi.

Maneni Khezhie-i asayartem dang takok anguba atema dang benjungtsü masü saka sportsmanship tanüla, telongjem aser chess asaya meimba benjungtsü ayongzük.

Chief arbiter ama NCA Honorary Secretary Mughaho Awomi-i asayamung temzüng ozüng indang metetdaktsü. Asayamung lapokba sentong ya Sulivi Assumi lenisüba nung agia liasü.

46buba Inter District & State Badminton championship tenzükogo



Dimapur, Chiteni/July 30 (TYO): Li-Ning 46buba Inter District & State Badminton championship July 30 nü NAPTC, Chumoukedima nung tenzükogo. Iba asayamung ya Li-Ning-i senotsü teyari agüja Nagaland Police-i ayongzükba asayadaki.

Asayamung nung Nagaland Police team densema district 14 nungi asayar 186 dak temai shilem agidar, koba August 2 nü tashi

asayatsü.

District ajak nung team tem yamai alitsü: Chumoukedima - 13, Dimapur - 15, Kiphire - 4, Kohima - 22, Longleng - 11, Mokochung - 22, Mon - 11, Nagaland Police-7, Niuland - 10, Peren - 18, Phek - 16, Shamator - 9, Tseiminyu -16, Wokha - 3, Zunheboto - 9 aser ajak senteper tebur- 125 aser tetsür- 61

Asayamung nung Senior aser Junior categories, tetsür

& tebur kija asaya, tarep aser tarep temeyoktep asaya aser Junior Boys & Girls U-19 kija aser tarep asayatsü.

Asayamung lapokba sentong nung Nagaland Police, Pastor-i Tsüngrem temaotsü meshizüka sarasadema liasü. Iba sentong nung district balala nungi team tem, Nagaland Police team aser Nagaland Badminton Association nungi ketdangsürtemi shilem agia liasü.

SMGSF advisory board senden nung Roko Angami adentsü



Kohima, Chiteni/July 30 (TYO): Nagaland Masters Games Association (NMGA) vice president Roko Angami, August 3 nü New Delhi nung

Super Masters Games & Sports Federation (SMGSF) Advisory Board senden nung shilem agitsü renema lir.

SMGSF senden nung shilem agitsü atema pa NMGA-i nominate süia liasü.

Senden nung sensaksemstü aliba onüktem rongnung; 2024 küm February ita Goa nung asayaba 6buba National Games lepa reprangshitsüba, World Masters Games-2025 nung shilem agitsüba, 7buba National Masters Games atema anogo, asayatem aser tesem

lemtettsüba, Federation aser India ajunga nung affiliate süia aliba MGA tem jenjang ajungkettsü atema sensaksemstüba, aser state tem nung küm shia asayatsü atema asayatem calendar yanglutsüba densema lir.

Roko Angami ya saisapong meimba nisung ka aser taoba mapang international football asayar ka lir. Pa tang Nagaland Football Coaches Association tir lir aser iba den state nung football asayartem jenjang balala nung coach süia arudar.

Olympics: Manu & Sarabjot nati bronze medal angu

Chiteni/July 30, 2024 (Agencies): Paris Olympics nung Mongolbarnü shooter Manu Bhaker aser Sarabjot Singh nati 10m Air Pistol tarep temeyoktep asaya nung bronze medal anguba sülen India-i tanabuba medal nguogo.

India nung tarep temeyoktep asayar yagi South Korea nung tarep Wonho Lee aser Jin Ye Oh 16-10 agi koka India atema tanabuba medal ngutsüogo. Bhaker-i tetsür 10m air pistol asaya nung bronze medal ka ngur liasü.

Tarep temeyoktep asaya nung bronze medal anguba sülen Manu Bhaker ya India nung asayartem rongnungi Olympic ka nung medal ana anguba mezüngbuba asayar kümogo.

Kasa mapang nung Sarabjot Singh ya India nung asayartem rongnungi Olympics nung medal angurtem rongnungi trokbuba kümogo. Pa indang partner Manu Bhaker ya anogo ana tejkadang India nung asayartem rongnungi Olympic nung medal ka anguba asayar pongububa küma liasü.

Anogo ishika tejkadang 10m air pistol asaya nung final atongba sülen Manu Bhaker ya küm 20 sülen India tsürtem rongnungi shooting asaya nung Olympic final atongba mezüngbuba asayar aküm. India tsürtem rongnungi Suma Shirur-i tatema Athens Olympics nung final tonga liasü. Lai 10m air rifle asaya nung final tonga liasü.

England white-ball coach Matthew Mott-i mapa toktsüogo

Chiteni/July 30, 2024 (Agencies): England tebur team white-ball head coach Matthew Mott-i mapa toktsüogo, ta England & Wales Cricket Board (ECB)-i Mongolbarnü sangdong ka ajanga metetdaktsü.

Tawa tembangba T20 World Cup nung England team semifinal nung India-i tsükdaktsüba sülen tang pai iba telemtetba ya agiogo.

Mott-i coach mapa ya 2022 küm May ita agizük aser pa lenisüba nung team-i takok tajung aika nguogo. Pa lenisüba nung England team-i 2022 T20 World Cup koka liasü.

Maneni pa lenisüba nungsa England team-i, white-ball asayamung balala nung Australia, Bangladesh, Ireland, Netherlands, New Zealand, aser Pakistan kokogo. Takok tajung aika nguaka ECB aser Mott na tangatettep nung iba telemtetba agiogo.

Permanent coach ka meshim tsüngda taoba mapang England

batsman Marcus Trescothick-i khen atema coach mapa bena atatsü. Pa lenisüba nung England team Australia den September ita asayatsü. Marcus Trescothick ya tang assistant coach lir.

ECB Managing Director Rob Key-i Mott dang kanga pelaba lemsatepogo. "Pai kechi ajangzüktogeto iba atema pa nema adangtsüla, kechiyong pa ya World Cup akokba England team coach tem rongnung tasembuba ama mapa nungi anener. Key-isa iba telemtetba agiba dak sendakba nung, "mapa tatsüka tsüngda World Cup asem asayaba sülen team tarutsü atema direction tasen ka nungdaker ta bilemer," ta ashi.

Kasa mapang nung Mott-ia, England team coach mapa inyaktsü atema maangka anguba atema kanga pelaba lemsatepba den pai kechisa ajangzüktogeto, item ajak atema kanga nema danga bilemba lemsatepa liasü.

KHRISTAN OSANG : Tapak 5 nungi...

MP nung Christian school ka telung...

Madhya Pradesh nung nütsüng yongsük million 72 dak tema aliba nungi Khristanpur shilem 0.27 dang lir aser timba Hindu nung lir. Hindu yimsü amanger tribal nisungtem shilem 21 dak tema lir.

Tang tashinung ken o kata benoka mali, ta putiri ashi.

"Ken o benoktsü atema onoki okatsür aser tsürabortem den shisa agiteper," ta Bishop Kharadi-i ashi.

July 22 nüa ABVP nungi activist 50 shi Madhya Pradesh nung Sagar diocese kübok Vandana Convent School telungi ait aser school principal-i Hindu nung kaketchir temulung yirutsüba atema temerenshi agütsütsü khanga liasü.

Activist temi ajungshiba mazüokteti police temi nun

principal densema school management anema ken o ka benok. Principal-i kaketchir dang English oshi jembitsü ashiba yong iba tashi atalok, koba school nung medium of instruction lir.

Onok kaketchir reju nung Dalits (taoba mapang untouchables) aser indigenous nisungtem yarir, shirnoki education tajung monguteter ta state yimtiba Bhopal nungi Catholic lenir Daniel John-i ashi.

Christian school temi school fee tali meshir ta tai tonglokttsür aser Catholic putir ka aser Protestant Church of North India bishop densema arogoi lapokba school manager aika iba state nung May 27 nungi tepuokdak yua lir.

BILEMDANGANG
 "Anepdang langka tajung bilemba ajanga anogo ajunga melenshidaktsütsü."